

Nioqqutissanik eqqussuineq annissuinerlu pillugit Namminersorlutik Oqartussat nalunaarutaat

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi, kingullermik Inatsisartut inatsisaatigut nr. 64, 20. november 2023-imeersukkut allangortinneqartumi § 2, imm. 1, § 3, § 11, imm. 2 aamma 3, § 16, § 16 a, imm. 1 aamma 2, § 18, imm. 1-3, § 19, imm. 2 aamma 3, § 20, § 22, imm. 2, § 35, imm. 1 aamma 2, § 39, § 40, § 42, imm. 2 aamma § 46, imm. 6 naapertorlugit aalajangersarneqarput:

Kapitali 1

Ataatsimut aalajangersakkat

§ 1. Danmarkimit, Savalimmiunit nunanilluunniit allanit eqqussinermi aammalu Danmarkimut, Savalimmiunut nunanulluunniit allanut annissinermi nioqqutissanik tiguisussat nioqqutissanillu nassiussisut nioqqutissat eqqunneqartut anninneqartullu nalingi, suussusaat, annertussusaat, nunamit sumit pisaaaneri, nunamit sumit pingortuuneri, nunamut sumut tunineqarneri, nunami sumi atorneqarnissaat qanorlu assartorneqarneri il.il. pillugit paasissutissat nalunaarutigisassavaat.

Imm. 2. Akileraaruseriffiup nioqqutissanik tiguisussat nioqqutissanillu nassiussisut nassiussinermut, akitsuutininik naatsorsuinermut, naatsorsueqqissaarnermut aamma nioqqutissat allaffissornikkut nalunaarsornerannut aamma suliarineqarnerannut tunngassutilinnik paasissutissanut tunngatillugu sukumiinerusunik paasissutissanik tunniusseqqusinnaavai.

Kapitali 2

Nioqqutissanik eqqussuineq

§ 2. Useqarnermik nalunaaruteqarnermi, akitsuusigassanik nalunaaruteqarnermi aammalu eqqussinermik nalunaaruteqarnermi immersugassat Akileraaruseriffimmit akuerineqarsimasut, immersugassat immikkoortortalersorneri immersornissaannullu najoqqutassat naapertorlugit immersorneqartussat atorneqassapput.

Imm. 2. Paasissutissat elektroniskiusumik nassiunneqarnissaat Akileraaruseriffiup piumasarisinnaavaa.

Imm. 3. Paasissutissat qanoq ittuunissaat, iluseqarnissaat tulleriarneqarnissaallu, pissutsillu allat Akileraaruseriffiup digitaliusumik nalunaarutigineqartunik suliaqarnissaanut pingaaruteqartut pillugit piumasaqaatit Akileraaruseriffiup aalajangersarsinnaavai.

Imm. 4. Immersugassat ilaqartinneqassapput ilumoortuunerannik uppenarsaatitut allagartanik, soorlu akiligassat allagartaannik, nassiussinermi uppenarsaatinik imaluunniit eqqussinissamut akuersissutinik.

§ 3. Danmarkimit, Savalimmiunit nunanilluunniit allanit sikaritsinik eqqussinermi tunisisup pisussaaffigaa poortat ataasiakkaat Kalaallit Nunaannut eqqunneqarnerannut nipitittakkamik nalunaaqutsissallugit akitsuuserneqarsimanerannut takussutissamik.

§ 4. Nioqqutissat toqqaannartumik imaluunniit Danmarki aqqusaarlugu Savalimmiuniit nunanilluunniit allaniit nassiunneqartut pillugit eqqussinermik nalunaarut Akileraaruseriffimmut tunniunneqassaaq.

Imm. 2. Eqqussinermik nalunaarummut akitsuusiinissamillu nalunaarummut ilanngunneqassapput tunisisumit akiligassap allagartaa, nassiussat uppernarsaataat allallu akitsuusiinermut kisitsisitigullu naatsorsueqqissaarluni takussutissionermut il.il. uppernarsaatitut pisariaqartinneqarsinnaasut.

§ 5. Nioqqutissat Danmarkimi pisiarineqartut Kalaallit Nunaanni akitsuusigassat Akileraaruseriffimmut akitsuusigassatut nalunaarutigineqartassapput, taamaattorli tak. imm. 2.

Imm. 2. Nioqqutissat imm. 1-imi taaneqartut Danmarki aqputigalugu umiarsuakkut nassiunneqarpata tunniunneqarnerannut atatillugu akitsuusiinissamik nalunaarut Akileraaruseriffimmut tunniunneqartassaaq.

Imm. 3. Akitsuusiinissamik nalunaarummut ilanngunneqassapput tunisisumit akiligassap allagartaa, nassiussat uppernarsaataat allallu akitsuusiinermut kisitsisitigullu naatsorsueqqissaarluni takussutissionermut il.il. uppernarsaatitut pisariaqartinneqarsinnaasut.

§ 6. Palitsit imaqanngitsut aamma containerit kiisalu poortuutit imaqanngitsut atornikullu, eqqussinermik nalunaarsorneqarnissaat piumasarineqanngilaq.

Imm. 2. Illerfiit aamma toqusut ikuallatat arsaquinut qummuattaasat kiisalu angalanermi atortut, angalanermi taqussat assigisaallu eqqussinermik nalunaarsorneqarnissaat piumasarineqanngilaq.

Imm. 3. Eqqussinermik nalunaarsuisoqartariaqanngilaq Akileraaruseriffiup nassiussat tigusassatut tunniuppagit, tak. imm. 4.

Imm. 4. Nassiussat nioqqutissanik akitsuusigassanik imaluunniit eqquteqqusaanngitsunik imaluunniit assigisaanik imaqanngippata Akileraaruseriffiup nassiussat makkuninnga imallit tigusassatut tunniunneranni nalunaarutigineqartussaajunnaarsissinnaavai:

- 1) tunissutit inunnit ataasiakkaanit ingerlatitat,
- 2) atortut pilertortumik annertunerusumillu annaassiniarnerni ikiuiniarnerniluunniit atorneqartussat,
- 3) imarsiortunik sammisassaqartitsiniutit umiarsuit umiarsualivissisimaneranni inuttaasunit atorneqartussat,
- 4) imarsiortunik sammisassaqartitsiniutit nunat allat umiarsuaasa nunat tamalaat akornanni angalaartut iluarsagassatut nunamut oqqussaat,
- 5) danskit savalimmiormiullu umiarsuaataannut timmisartuinullu nunanut allamukartaatinut aammalu nunat allamiut umiarsuaannut timmisartuinullu kingoraartissat atortussallu il.il., kingoraartissat atortussallu umiarsuarnut timmisartuinulluunniit pineqartunut tunniunneqarpata,
- 6) nioqqutissat, Danmarkimi, Savalimmiuni nunaniluunniit allani iluarsarneqarsimallutik atorneqarallarsimallutilluunniit eqquteqqinneqartut, nioqqutissanik tigusisoq annissinermik nalunaarutip nuutinneranik uppernarsaammilluunniit allamik pisariaqartumik takutitsisinnaappat,
- 7) pequtit pialuutillu atoreersimasutut isikkullit inunnillu Kalaallit Nunaanni najugaqalersunit

eqqunneqartut, imaluunniit

8) nioqqutissat atortussallu sakkutooqarfinni, Kalaallit Nunaata illersorneqarnissaa pillugu isumaqatigiissummi 27. april 1951-imeersumi pineqartuni USA-p sakkutuuisa ingerlataanni atugassatut eqqunneqartut.

§ 7. Nioqqutissat § 6, imm. 1 aamma 2-imi taaneqartut assigisaat eqqaassanngikkaanni, nioqqutissat Savalimmiuniit nunanilluunniit allaniit umiarsuakkut toqqaannartumik imaluunniit Danmarki aqqusaarlugu tikittut kiisalu nioqqutissat Danmarkimiit, Savalimmiuniit nunanilluunniit allaniit timmisartukkut tikittut usigineqartutut nalunaarsorneqartassapput.

Imm. 2. Usigisanik nalunaarsuineq pissaaq nassiussat ataasiakkaat immikkut usigineqarnerisa nalunaarutigineqarnerisigut.

Imm. 3. Usigisanik nalunaaruteqarnek nassiussalerisumit, speditørimit, assartuisumit taassumaluunniit tuniniaasuanit suliarineqartassaaq, tunisisumillu akiligassap allagartaata assilineranik kiisalu usilersuineramik nalunaarutip allagartaata assilineranik, tassa imaappoq umiarsuup imaluunniit timmisartup usiisa nalunaarsorneqarfiannik ilaqartilugu Akileraaruseriffimmut tunniunneqarluniluunniit nassiunneqartassaaq usit Kalaallit Nunaanni umiarsualivimmut timmisartoqarfimmulluunniit siullermut tikiunneqarnerisa kingorna piaartumik.

Imm. 4. Nassiussanut usinik isumannaallisarneqarsimasunik imaqartunut tunngatillugu usigisat sueneri pillugit sukumiisumik nalunaarsuiffup assilineranera Akileraaruseriffimmut nassiunneqassaaq.

§ 8. Usigisanik nalunaaruteqartussaannermi ilaapputtaaq aalisakkat aalisakkanillu tunisassiat danskit, savalimmiormiut imaluunniit nunat allat aalisariutaannit nunnigunneqartut. Usigisanik nalunaaruteqarnek umiarsuup ingerlatitsisuanit imaluunniit umiarsuup piffimmi tassani tuniniaasuanit assigisaannilluunniit isumagineqartassaaq.

Imm. 2. Umiarsuarmik timmisartumilluunniit Danmarkimi, Savalimmiuni nunaniluunniit allani pisinermut atatillugu, umiarsuarlu timmisartorluunniit nammineq ingerlalluni Kalaallit Nunaannukarpat usigisanik Akileraaruseriffimmut nalunaaruteqartoqassaaq. Usigisanik nalunaaruteqarnek umiarsuup timmisartulluunniit ingerlatitsisuanit, piginnittuanit imaluunniit piginnittup sinniisuanit isumagineqartassaaq.

Imm. 3. Usigisanik nalunaarut Kalaallit Nunaannut apuunnerup kingorna piaartumik Akileraaruseriffimmut nassiunneqarluniluunniit tunniunneqartassaaq.

§ 9. Usit nassiunneqarfiannut tikiunneqarnerisa kingorna kingusinnerpaamik ullunnaat 10-t qaangiunnerini nioqqutissanik tiguisup nioqqutissat anniseqqillugilluunniit Akileraaruseriffimmut eqqussinermik nalunaarsuusiussaaq imaluunniit akitsuusiinissamik nalunaaruteqassaaq.

Imm. 2. Assartuineramik isumaginnittoq pisussaavoq nassiussat nassiussatut nalunaarsorneqarsimasut nassiunneqarfiannut apuunnerat nalunaarutigissallugu.

Imm. 3. Nioqqutissat anniseqqitassatut aalajangerneqarsimasut ammarnagit puuniitiinnarneqassapput.

§ 10. Taamaattorli § 9, imm. 1-imi 3-milu aalajangersagaq atuukkaluartoq, nioqqutissat makku eqqunneqarnerminni anniseqqitassatut aalajangiivigineqareersimasut anninneqarnissaannut piffissaliussaq qaammatit 8-t tikillugit sivitsorneqarsinnaavoq:

- 1) Iisimatusarnermut atortut kiisalu ilisimasassarsiortut atortui, piginnitsiminnit danskiusumit, savalimmiormiusumit nunamilluunniit allamiumit atugassatut eqqunneqarallartut.
- 2) Radiomut, videomut fjernsynimullu atortut kiisalu filmiliornermut atortut piginnitsiminnit danskiusumit, savalimmiormiusumit nunamilluunniit allamiumit radiukkut videokkullu aallakaatitassiornissat imaluunniit filmiliornissat siunertaralugit eqqunneqarallartut.
- 3) Sulinermi atortut, soorlu sakkuutit, atortut, apparatit, uuttortaait maskiinallu piginnitsiminnit danskiusumit, savalimmiormiusumit nunamilluunniit allamiumit atugassatut eqqunneqarallartut.

Imm. 2. Annisseqqinnissap sivitsorneqarsinnaaneranut piumasaqaataavoq nioqqutissat immikkuutaarlugit nalunaarsuutip useqarnermik nalunaarummut ilanngullugu nassiussat tunniunneqannginneranni Akileraaruseriffimmut tunniunneqarsimanissaa.

§ 11. Nioqqutissat nassiussatut nalunaarsuinerup nalaani allamut tigusassanngortinneqarpata nassiussalerisup allamulluunniit tigusassanngortitsisup piginnittup allanngornera piaartumik Akileraaruseriffimmut nalunaarutigissavaa, piginnittunngortup aqqa, najugaa attaveqarnissamullu paasissutissat nalunaarutigalugit.

§ 12. Nioqqutissat Kalaallit Nunaanni najugaqanngitsumut nalunaarneqarsimappata, nassiussinermi nalunaarummik suliaqartoq nioqqutissanik tigusisutut isigineqassaaq, taamalu ilaatigut eqqussinermi akitsuutip suliarinninnermilu akiliutit akilerneqarnissaannut akisussaassalluni.

§ 13. Nioqqutissat nassiussatut nalunaarsorneqartut tigusisussamut tunniunneqarsinnaalissapput nassiussat Akileraaruseriffimmut nalunaarutigineqarpata. Tunniunneqarsinnaalersitsinerli aatsaat atuutilissaaq, nioqqutissanik tigusisup nioqqutissanut pineqartunut immikkut eqqussinermi piumasaqaataasinnaasut naammassisimappagit, aamma akitsuutit akilerneqartussanngortinneqarsinnaasut akilersimappagit.

Imm. 2. Inuusutissarsiutigalugu suliffeqarfii Kalaallit Nunaanni angerlarsimaffeqartut nassiussat pillugit Akileraaruseriffimmut nalunaaruteqannginnerminni qinnuteqarnermikkut nassiussanik nalunaarsorneqarsimasunik tigusisinnaanissaat Akileraaruseriffiup akuersissutigisinnaavaa. Nassiussalli tunniunneqarneranniit kingusinnerpaamik ulluinnaat 10-t qaangiunneranni Akileraaruseriffimmut nalunaarutigineqarsimassapput. Akuersissutip suliffeqarfinnut § 23, imm. 1 naapertorlugu akuersissuteqarfigineqartunut taamaallaat atuunnissaa Akileraaruseriffiup aalajangersinnaavaa.

Imm. 3. Imm. 1 naapertorlugu akuersissut nalunaaruteqarnissamut piffissaliussap annertuumik arlaleriartumilluunniit eqquutsinneqannginnerani, taamaaliortoqaratarsinnaanerani luunniit atorunnaarsinneqarsinnaavoq.

§ 14. Nassiussat, tak. § 9, imm. 1 aamma § 13, imm. 2, piffissaliussatut aalajangikkap qaangiutinnginnerani nalunaarutigineqanngippata Akileraaruseriffiup nalunaaruteqartussaq allakkatigut piumasaqarfigissavaa, aaqiiinissamullu ullut 3-t piffissaliunneqassallutik.

Imm. 2. Piumasaqartoqartillugu, tak. imm. 1, nalunaaruteqartussaq suliarinninnermut 500 kr.-nik akileeqquneqassaaq.

§ 15. Poortukkat Savalimmiuneersut nunanilluunniit allaneersut Danmarki aqqusaarlugu Kalaallit Nunaannut nassiunneqartut adressekortimik, akiligassat allagartaannik, immaqalu eqqussisinnaanermut akuersissummik uppersaammillu allamik, eqqussinermik nalunaaruteqarnissamut kiisalu nioqqutissat akitsuusigassaasut nassiussap imarisimasinnaasaasa akitsuutaannik naatsorsuinissamut pisariaqartunik ilaqartinneqassapput.

Imm. 2. Nassiussanik assartuisut eqqussinermik nalunaarummik Akileraaruseriffimmut tunniussissaaq, kiisalu akitsuutit annertussuserisinnaasaannik naatsorsuissaaq akitsuullu naatsorsorneqartoq nassiussat tunniutinnginnerini akileqqullugu.

Imm. 3. Nassiussanik assartuisut nassiussat 7.500 kr.-t inorlugit naleqartut ataatsimoortillugit nalunaarutigisinnaavai. Nalunaaruteqarfissat ilusiligaanerat Akileraaruseriffiup aalajangersassavaa.

§ 16. Poortukkanik, nioqqutissanik inuussutissarsiornermut tunngassuteqartunik akitsuusigassanik Danmarkimi pisarineqarsimasunik imalinnik Danmarkimi nassiussisut nassiussanik assartuisut akitsuusiinissamik nalunaaruteqassapput, tassunga ilanngullugit adressekortit, tunisisumit akiligassap allagartaa aamma eqqussisinnaanermut akuersissutaasinnaasoq il.il.

Imm. 2. Poortukkat allat, nioqqutissanik akitsuusigassanik Danmarkimi pisarineqarsimasunik imallit adressekortimik, tunisisumit akiligassap allagartaannik, uppersaammilluunniit allamik, akitsuutit naatsorsorneqarnissaanut pisariaqartinneqartunik ilaqartinneqassapput.

Imm. 3. Nassiussanik assartuisut nassiussanut imm. 2-mi ilaatinneqartunut akitsuutissat annertussusiat naatsorsussavaa, kiisalu nassiussanut imm. 1-imi 2-milu ilaatinneqartunut akitsuutit nassiussat tunniutinnginnerini akileqqussallugit.

§ 17. Akileraaruseriffiup ilitersuutaani inassutigineqarpoq nassiussanik assartuisut allakkerisarfikkut nassiussanik annikitsunik kisitsisitigut naatsorsueqqissaarnermut tunngasunut il.il. nalunaarsorneqanngitsumik ingerlatseqqiisarnissaa.

Sakkutooqarfimmut nioqqutissanik eqqussineq

§ 18. Sakkutooqarfimmi Pituffimmi danskisut innuttaassuseqartunut danskillu suliffeqarfinit nioqqutissanik eqqussineq, niuernikkut kisitsisinik naatsorsueqqissaarnermut tunngasunik nalunaarsuutit paasissutissinissaq eqqarsaatigalugu Kalaallit Nunaata sinneranut nioqqutissanik eqqussinermi maleruagassat naapertorlugit pissaaq.

Kapitali 3

Eqqussuinermit akitsuutit

§ 19. Nioqqutissap akiligassap allagartaani nalingata annertussusia akitsuummik naatsorsuinermit tunngavigineqassapput, akiligassap allagartaani aki tassaavoq nioqqutissap pisarineqarnermini akia, tassa imaappoq aki nioqqutissap eqqunneqarfia sioqqullugu akilerneqarsimasooq, imaluunniit akiliineq piffissami nioqqutissap eqqunneqarfiani pissapput akilerneqartussaagaluaq. Tamatuma nassataraa nioqqutissamut akikillisaatit ilanngaatiq suulluunniit, imaluunniit akimik appartitsissutit allap naliliinermit

ilanngaatigineqarsinnaanera, nioqqutissamut akikillisaatit ilanngaat akimut akilerneqarsimasumut akiligassamulluunniit naapertuuttuuppat. Piumasaqaataavoq akikillisaatit ilanngaatip nioqqutissanut nalilerneqartussanut tunngassuteqartuunissaa. Nioqqutissamut akikillisaatit ilanngaatit kingumoortumik atortuusut ilanngaatigineqarsinnaangillat.

Imm. 2. Akiligassat allagartaata aningaasartaasa nunat allamiut aningaasaataannit naatsorsornissaanni aningaasat nalingisa Danmarks Nationalbankimi allattorsimaffiat kingulleq atorpeqassaaq.

Imm. 3. Naatsorsuinermi tunngavigineqartut pillugit Akileraaruseriffimmut assuarlertoqassaaq nalunaarummik tigusinerup kingorna ullut 14-it qaangiutsinnagit.

§ 20. Akitsuutit naatsorsorneqassapput ullormi nioqqutissat akitsuuteqarfusumut eqqunneqarfianni akitsuutit atuuttut tunngavigalugit.

Imm. 2. Nioqqutissanulli § 5, imm. 2-mi ilaatinneqartunut ulloq tunngavigineqartussaq tassaavoq ulloq akitsuusiinissamik nalunaarutip Akileraaruseriffimmit tiguneqarfia.

§ 21. Nioqqutissat Danmarkimiit, Savalimmiuniit nunanilluunniit allaniit timmisartukkut tikittut akitsuutaasa akiligassanngorsimasut ulloq piffissaagallartillugu akilerneqarfissaat kingulleq tassaavoq nioqqutissat tigusisussamut tunniunneqarfiat.

§ 22. Nioqqutissat Danmarkimiit umiarsuakkut tikittut akitsuutaasa akiligassanngorsimasut ulloq piffissaagallartillugu akilerneqarfissaat kingulleq tassaavoq ulloq nioqqutissat tigusisussamut tunniunneqarfiat, taamaattorli tak. § 23, imm. 1 aamma § 24, imm. 1-4.

§ 23. Nassiussanut inuussutissarsionermut tunngassuteqartunut Danmarkimiit, Savalimmiuniit nunanilluunniit allaniit tikittunut tunngatillugu, suliffeqarfiit inuussutissarsiummik ingerlataqartut Kalaallit Nunaanni angerlarsimaffeqartut akiliinissaannut piffissarititaasoq § 22-mi taaneqartoq Akileraaruseriffiup qinnuteqartoqarneratigut sivitsorsinnaavaa. Akileraaruseriffiup aalajangersinnaavaa akuersissut taamaallaat nassiussanut akuersissutit normuannik normulerneqarsimasunut atuutissasoq.

Imm. 2. Imm. 1 malillugu akuersissutinik nalunaaruteqarnissami piumasaqaataavoq suliffeqarfiup qinnuteqaammut ilanngullugit nassiutissagai inuussutissarsiummik ingerlataqarsinnaanermut akitsuutit akilerneqarnissaannut qularnaveeqqutit aningaaserivimmit sillimmasiisarfimmilluunniit Kalaallit Nunaanni, Danmarkimi Savalimmiuniluunniit angerlarsimaffeqartumit uppersaata aningaasartalik. Akitsuutit akilerneqarnissaannut qularnaveeqqut akiliinissamut piffissarititaasumi sivitsukkami katillugit akileraarutit akilerneqartussatut naatsorsuutigisat annertoqatigissavai, tak. § 24, imm. 2, tamannali annerpaamik 500.000 kr.-ussaaq. Tamatuma saniatigut suliffeqarfiup uppersaata suliffeqarfiup CVR-normuanik aamma suliffeqarfiup suunera pillugu paasisutissanik imalik nassiutissavaa.

Imm. 3. Akiliinissamut piffissarititaasoq annertuumik arlaleriarluniluunniit eqquutsinneqanngippat, taamatulluunniit pisoqarnialerpat akuersissutit imm. 1 malillugu nalunaarutigineqartut utertinneqarsinnaapput.

§ 24. Akiliinissamut piffissarititaasut, tak. § 23, imm. 1, qinnuteqartup aalajangersimasumik ingerlatsivia tunngavigalugu sivitsuiffigineqartut qaammammi tassani piffissaagallartillugu akiliiffissap naaneraniit naatsorsorneqassapput.

Imm. 2. Akiliinissamat piffissarititaasut sivitsuiffigineqartut piffissaliussat uku qaangerlugit sivitsorneqarsinnaangillat:

- 1) Nanortalik, Qaqortoq, Narsaq, Narsarsuaq, Kangilinnguit, Paamiut, Nuuk, Maniitsoq aamma Sisimiut taakkulu nunaqarfii ilanngullugit qaammatip tulluuttup ulluisa 20-anni.
- 2) Aasiaat, Kangaatsiaq, Qeqertarsuaq, Qasigiannugit aamma Ilulissat taakkulu nunaqarfii ilanngullugit qaammatip piffissaagallartillugu akiliiffissap naaneraniit, qaammatit 2-t ullullu 15-it.
- 3) Uummanaq aamma Upernavik taakkulu nunaqarfii ilanngullugit qaammatip piffissaagallartillugu akiliiffissap naaneraniit, qaammatit 3-t ullullu 15-it.
- 4) Tasiilaq taassumalu nunaqarfii ilanngullugit kiisalu Kangerlussuaq qaammatip piffissaagallartillugu akiliiffissap naaneraniit, qaammatit 3-t ullullu 20-it.
- 5) Ittoqqortoormiit kiisalu Tunup avannaani sumiiffiit allat, aamma Qaanaaq taakkulu nunaqarfii ilanngullugit qaammatip piffissaagallartillugu akiliiffissap naaneraniit, qaammatit 5-it ullullu 15-it.

Imm. 3. Ulloq piffissaagallartillugu akiliiffissaq arfininngornerulluni, sapaataalluniluunniit nalliuttuuppat, piffissarititaq ulluinnarmut tullermut sivitsorneqassaaq.

Imm. 4. Nassiussanut Danmarkimiit umiarsuarmik tikittunut tunngatillugu imm. 1 malillugu piffissarititaasut naatsorsorneqartassapput, ulloq umiarsuup Danmarkimit aallarfia aallarnerfigalugu. Nassiussanut allanut tunngatillugu imm. 1 malillugu piffissarititaasut naatsorsorneqartassapput ulloq nioqqutissat Kalaallit Nunaanni umiarsualivimmut siullermut tikiffiat aallarnerfigalugu.

§ 25. Allatut aalajangiisoqarsimangippat akitsuutit Akileraaruseriffup akiliiffigineqartussatut innersuussaanut akilerneqartassapput.

Imm. 2. Akiliiffigineqartartup akitsuutit qaammatip siuliani akiligassanngorsimasut kingusinnerpaamik qaammatip tulluata ulluisa 15-ianni Akileraaruseriffimmut akilertassavai.

§ 26. Inunnut ataasiakkaanut tunissutitut nassiussanut tunngatillugu akitsuutit nassiussanut ataatsimut 100 kr.-nit ikinnerusut akilersinneqartassangillat.

§ 27. Akileraaruseriffik timmisartunut mittarfinni niuertarfiit nioqqutissanik akitsuuteqanngitsunik eqqussuinnissaannut nioqquteqarnissaannullu akuersissuteqartartuuvoq, nioqqutissallu akitsuuteqanngitsunut peqqumaasivinnut il.il. ilanngunneqartut taakkunanngaanniillu ilanngaatineqartut qanoq toqqortarineqarnissaat nakkutilliinerlu pillugit erseqqinnerusunik aalajangersagaliortuulluni.

Imm. 2. Akuersissuteqarnissami piumasaqaataavoq, tak. imm. 1, tuniniaaviit akitsuuteqanngitsumik tuniniaanerat, angalasut Danmarkimiit, Savalimmiuniit nunanilluunniit allaniit tikittut kisimik pisinissaat.

Imm. 3. Akileraaruseriffik imm. 1 naapertorlugu akuersissutinik tunniussinnermi aalajangersaasinnaavoq, akuersissuteqartut nioqqutissanik tuniniaanerminni pisisup boardingkortiat, tamatumani ilanngullugu pisisup aqqa, aamma akileraaruseriffimmut taakku paasissutissat ingerlateqqinneqarnissaannut nalunaarsuissasut, tak. nioqqutissanik eqqussuinnermi akitsuutit pillugit Inatsisartut inatsisaanni § 11, imm. 2.

Imm. 4. Niuertarfiit nioqqutissat akitsuuteqanngitsut angalasunut tunniunneqannginneranni puussiani matoqqasuni akimullu ersittuni poortussavai. Puussiat angalasut mittarfik aatsaat qimappassuk

ammarneqassapput.

Imm. 5. Nioqutissat akitsuuteqanngitsut niuertarfiit ammasarfiisa avataanni inimi parnaarsimasumi toqqortarineqartassapput.

§ 28. Umiarsuit timmisartullu danskit, savalimmiormiut nunalluunniit allat umiarsualiviinut mittarfinulluunniit ingerlassallutik Kalaallit Nunaanni akitsuuteqarfusumik qimatsilersut akitsuuteqanngitsunik taquassarsiniarsinnaapput.

Imm. 2. Nioqutissanik ataani taaneqartunik umiarsuit taquassarsiniarneranni annertussutsit inuk ataaseq ilaasumut 18 sinnerlugit ukiulimmut ullormut unnuamullu ataatsimut angallavissamut naatsorsuutigineqartumut sinnerneqassanngillat:

- 1) 40 g tupat,
- 2) 0,25 liter imigassaq kimittooq,
- 3) 0,25 liter viinni aamma
- 4) 2 liter immiaaqqat.

Imm. 3. Akileraaruseriffiup umiarsuit ilaasunik angallassisut nunanit allaneersut umiarsualivimmi, Kalaallit Nunaanni umiarsualivimmit kingullertut aallarfirmmit siusinnerusumi akitsuuteqanngitsumik taquassarsiniarnissamut akuersissuteqarfigisinnaavai.

Imm. 4. Nioqutissat imm. 3 malillugu taquassarsiarineqartut, umiarsuup akitsuuteqarfusumik qimatsinissaata tungaanut akitsuuteqanngitsumik umiarsuarmi nioqutissaasivimmi Akileraaruseriffimmit naqissuserlugu parnaarneqartumi toqqortarineqassapput.

Imm. 5. Umiarsuit imm. 3-mi taaneqartut aamma timmisartut taquassarsiniarneranni ilaasuisa inuttaasalu amerlassusii kiisalu umiarsuarmi timmisartumiluunniit atugassatut tunisassatullu naatsorsuutigineqartut eqqarsaatigineqartassapput.

Imm. 6. Timmisartut akitsuuteqarfusumut tikinnerminni nioqutissanik imm. 1 naapertorlugu pisiarineqarsimasunik nassataqarpata, taakku timmisartup tikinnerani akitsuuteqanngitsumik nioqutissaasivimmut parnaarsimasumut immikkoortillugit ingerlaannaq toqqorneqassapput.

§ 29. Suliffeqarfiit aatsitassa qarneranik misissueqqaarnernut, misissueqqissaarnernut piiaanermulluunniit atatillugu aningaasarsiortut akitsuuteqanngitsumik taquassarsiniarsinnaapput, suliffeqarfiup tunisassiorfutaani, uuliamik qalluiviutaani tassungalu atatillugu atortuutaani kiisalu umiarsuaataani atortunilu allani, aatsitassa qarneranik misissueqqaarnernut, misissueqqissaarnernut piiaanermulluunniit atatillugu, akitsuuteqarfiup avataani kisiannili Kalaallit Nunaata immami killeqarfiata iluani imaluunniit immap naqqani nunap toqqaviata iluani atugassanik.

Imm. 2. Inuussutissarsiummik ingerlataqartup, umiarsuarnik timmisartunillu imaluunniit tunisassiorfinnik aalaakkaasunik ingerlasinnaasunilluunniit imm. 1-imi taaneqartunik nioqutissanik akitsuuteqanngitsunik taquassarsisitsisimasup, akitsuutip utertinneqarnissaa siunertarlugu taquassarsiniarnermut qinnuteqaat imm. 1-imi pineqartoq, akiligassallu allagartaata assilineranik ilaqartinneqartoq Akileraaruseriffimmut nassiutissavaa.

§ 30. § 28-mi aamma § 29-mi taaneqartut akitsuuteqanngitsumik taquassarsiarineqartut annertussusiat, pisisumit taquassarsiniarnermut uppersaasissavaat. Nioqutit akileraaruseriffimmit

anninneqannginneranni, uppersarsaat akileraaruseriffimmut qinnuteqaammik akuersisumut tunniunneqassaaq.

§ 31. Akitsuutit akilernerqarsimasut qinnuteqarnerup kingorna utertinneqarsinnaapput, nioqqutissanut

1) assartuineramik ingerlatseqatigiiffimmit assartorneqartillutik tammartutut ajoquserneqartutulluunniit nalunaarutigineqartunut,

2) inuussutissarsiummik ingerlataqartumiitsillutik ajoquserneqarsimasunut imaluunniit inunnit ataasiakkaanit suliffeqarfinnilluunniit ingerlatsinermut attuumassuteqaangitsunit tillinneqarsimasunut,

3) inuussutissarsiummik ingerlataqartumiitsillutik nakkutigisaasumik suujunnaarsinneqarsimasunut,

4) inuussutissarsiutugalugu tuniniaaqinnermut atatillugu Danmarkiliaanneqartunut,

Savalimmiuliaanneqartunut nunanulluunniit allanukaanneqartunut,

5) inuussutissarsiummik ingerlataqartumit inunnut ataasiakkaanut suliffeqarfinnilluunniit sakkutooqarfimmi aalajangersimasumik najugaqartunut najugaqavissunulluunniit tuniniaqqinneqartunut, tak. § 18,

6) inunnit ataasiakkaanit eqqunneqartunut, nioqqutissap amigaateqarnera, kukkuneqarneraluunniit pissutigalugu akitsuuteqarfusumit anniseqqinneqartunut,

7) tunisisumit akitsuusigassatut kukkusumik nalunaarutigineqartunut, tunniunneqarnerannilu nioqqutissanik tiguisussamit nakkutilliisunut takutinneqartunut, imaluunniit

8) naatsorsuinerlunnikkut kukkusumik akitsuuserneqarsimasunut.

Imm. 2. Akitsuutit utertinneqarnissaannik qinnuteqaateqarnermi Akileraaruseriffiup qinnuteqaateqarnermi immersugassiaa atorneqassaaq. Qinnuteqaat akileraaruseriffiup aalajangersagaa naapertorlugu akitsuutit uppersarsaatitaannik, tunisisumit akiligassap allagartaanik nassiussinermilu uppersarsaatini kiisalu nioqqutissaq tammarsimappat, aserorsimappat, anniseqqinneqarsimappat il.il. uppersarsaatini pisariaqartunik ilaqartinneqartoq qarasaasiakkut nassiunneqassaaq, nioqqutissanik nassiussinerup pineqartup akitsuuserneqarneranut uppersarsaat ilanngullugu.

Imm. 3. Nioqqutissanut imm. 1, nr. 1-imiit 5-imut taaneqartunut akitsuutit utertinneqassanngillat, qinnuteqaatit ataasiakkaat akitsuutitaat tamarmiisoq 500 kr.-nit minneruppat.

Imm. 4. Nioqqutissanut akitsuutit imm. 1, nr. 3 naapertorlugu utertinneqartunut akiliut aalajangersimasoq 1.000 kr.-usoq kiisalu aningaasat uterteqquneqartut 2 pct.-ii, aqqissuussinerup isumagineqarneranut atatillugu aningaasartuutitut matussutissatut akilernerqassapput. Aningaasat katillugit annerpaamik 5.000 kr.-ussapput. Aningaasat taakku aningaasat utertinneqartussat tunniunneqannginneranni ilanngaatigineqassapput.

Imm. 5. Akitsuutini imm. 1, nr. 3 naapertorlugu utertitisoqarnissaani nioqqutissat pineqartut sumiiffinnut, nakkutigisaasumik suujunnaarsitsiffiusinnaasunut assartorneqarnissaat akileraaruseriffiup piumasarisinnaavaa. Assartuinermut atatillugu aningaasartuutit qinnuteqartup akilissavai.

§ 32. Qamutit motorillit, inatsisini tamanna pillugu aalajangersakkat naapertorlugit akitsuuteqaangitsumik eqqunneqarsimasut kingusinnerusukkut akitsuusigassanngortillugit Akileraaruseriffiup akitsuut, Eqqussuinermi akitsuutit pillugit Inatsisartut inatsisaanni taaneqartoq qinnuteqartoqarneratigut appartissinnaavaa pisarinerani akiatut, minnerpaamilli nalinginnaasumik niuernermi nalingatut annertutigisunngorlugu.

Imm. 2. Akitsuummik appaanissaq aatsaat pisinnaavoq qamutit motorillit siunertamut

akitsuuserneqannginnissaminut pissutaasumut ukiut 4-t sinnerlugit atorneqarsimappata, imaluunniit akitsuuteqarfiusup avataani ukiut 4-t sinnerlugit nalunaarsorneqarsimappata.

Kapitali 4

Annissuineq

§ 33. Nioqqutissanik Savalimmiunut nunanulluunniit allanut toqqaannartumik imaluunniit Danmarkii aqqusaarlugu annissinermi tuniniaasoq/nassiussisoq annissineq pillugu nalunaaruteqassaaq.

Imm. 2. Nioqqutissat, nioqqutissat allattorsimaffianni kapitalini 2-mi, 3-mi, 5-imi, 15-imi, 16-imi, 22-mi, 23-mi, 25-mi, 26-mi, 41-mi, 43-mi 51-imilu inissisimasut Kalaallit Nunaanniit umiarsuakkut Danmarkimut assartorneqartut pillugit avammut nioqquteqartup/nassitsisup annissinermik nalunaarut Akileraaruseriffimmut nalunaarutigissavaa.

Imm. 3. Aammattaaq annissinermut nalunaarut piumasarineqarpoq nunat allamiut umiarsuaat, tassani ilaallutik danskit savalimmiormiullu umiarsuaat, Kalaallit Nunaanniikkallarnermi uuliamik orsussamillu immerneqartillugit. Tamanna aamma timmisartunut Kalaallit Nunaanni nalunaarsorneqarsimanngitsunut akitsuuteqarfiusumi uninngagallarnermi orsersortunut atuuppoq.

§ 34. Annissinermik nalunaaruteqarnissamik piumasaqaammi uku pineqanngillat:

- 1) Tunissutitut nassiussat annerpaamik 950 kr.-nik nalillit (Kalaallit Nunaanni pisiniarfimmi akia) inuussutissarsionermut attuumassuteqanngitsut inunnit ataasiakkaanit nassiunneqartut. Nassiussat allagartaanni allassimassaaq: "Tunissutitut nassiussaq".
- 2) Nioqqutissat misiligutit niuernermut attuumassuteqartut annerpaamik 500 kr.-nik nalillit. Puuanni nassiussallu allagartaanni allassimassaaq: "Nioqqutissat misiligutit".
- 3) Kitaata Tunullu akornanni nassiussat Danmarkii Islandiluunniit aqqusaarlugit ingerlatitat.
- 4) Aalisakkat aalisakkanillu nioqqutissiat nunat allamiut aalisariutaanneersut, danskit savalimmiormiullu aalisariutaanneersut ilanngullugit, nioqqutissiat pineqartut Kalaallit Nunaanni aalisakkerivinni suliarineqarsimanngippata.

Imm. 2. Annissinermik nalunaaruteqarnissami aammattaaq ilaatinneqanngillat:

- 1) Nioqqutissat tigummiannarlugit nassarneqartut imaluunniit nassatatut tunniunneqarsimasut, anninneqarnerat inuussutissarsiummik ingerlatsinissamik siunertaqanngippat.
- 2) Nammineq pigisat tamatumunnga ilanngullugit angalanermi atortut aamma taqussat.
- 3) Sakkuutit, uuttortaait, atortut assigisaallu, assassorlutik sulisartut eqqumiitsuliortulluunniit assassornerminni eqqumiitsuliornerminniluunniit atortagaat aallarnermi nassataat.
- 4) Nigaliliat naasullu, ilisinermut imaluunniit ilivernut pinnersaatissatut naatsorsuussat nunanut allanut nassiunneqartut nassarneqartulluunniit kiisalu naasut qilertat assigisaalluunniit nalliuttorsionermi tunissutissatut nunanut allanut nassiunneqartut nassarneqartulluunniit.
- 5) Timmisartut qamutillu motoorillit nunani allani nalunaarsortissimasut, Kalaallit Nunaannut eqqunneqarallarsimasut.
- 6) Umiarsuit, pujortuleqqat angallatillu tuniniagaanngitsut nammineerlutillu aallartut. Tuniniarnissaat siunertarineqarpat annissinermi nalunaarusiortoqassaaq Umiarsuillu Nalunaarsorneqarfiani allassimajunnaarnissaannik nalunaarnermi annissinermi nalunaarusiaq takutinneqassalluni.

- 7) Timmisartut Kalaallit Nunaanni angerlarsimaffeqartut tuniniagaanngitsut. Tuniniarnissaat siunertarineqarpat annissinermi nalunaarusiortoqassaaq taannalu Trafikstyrelsenimi allassimajunnaarnissaannik nalunaarnermi annissinermi nalunaarusiaq takutinneqassalluni.
- 8) Atuakkat, nuutit, allatsitsivissat, akit allattorsimaffii, nalunaarutit, allagartarsuit, atuinissamut ilitsersuutit naqitallu allat, atukkiussassatut tunissutissatulluunniit anninneqartut.
- 9) Naqitigassanngorlugit allatat, atuagassiat qaammatikkuutaartumik sapaatip akunnikkuutaartumillu saqqummersartut, aviisit assigisaallu Kalaallit Nunaanni naqiterneqarsimasut, kalaallillu suliffeqarfinit nunani allani pisartagalinnut tuniniaasartunullu nassiunneqartut.
- 10) Frimærkit frimærkinik allanik paarlaalluni taarsigassanngorlugit nunanut allanut nassiunneqartut.
- 11) Illerfiit inuup timaanik imallit qummuattaasallu inuit timaasa ikuallanneqarsimasut arsaakuinik imallit.
- 12) Timersornermi atortut, tamatumani ilaallutik qamutit sukkaniutit umiatsiallu iporsuutit, nunani allani timersuutit assigisaannillu unamminermit atuagassatut anninneqarallartut, imaluunniit Kalaallit Nunaanni taamatut atorineqareerlutik anniseqqinneqartut.
- 13) Aningaasat pappiaqqat aggorsimasullu, akiitsukkanut uppernarsaatit assigisaallu, kiisalu pappialat aningaasanik nalillit, aktiat piginneqataassutit pappiaqqallu nalillit allat, taakku 50.000 kr.-t nalingat sinnerlugu naleqanngippata.

§ 35. Nioqqutissanik usitut nalunaarsorneqarsimasunik, akitsuusiiffiqineqaratillu kisitsisinut naatsorsoqqissaagassanut ilanngullugit nalunaarsorneqanngitsunik anniseqqinnermi annissinermik nalunaarusiortoqassanngilaq, akerlianilli useqarnermik nalunaarutip immersugassartaa anniseqqinnermi uppernarsaammik ilaqartillugu Akileraaruseriffimmut takutinneqassalluni.

Imm. 2. Timmisartukkat nassiussat Kalaallit Nunaannut tikinnermi usitut nalunaarsorneqarsimasut, Danmarkimiillu tikittut danskiumillu pisiffimmit nassiunneqarsimasut anniseqqinneqarpata imm. 1-i apeqqutaatinnagu anniseqqinnermik nalunaaruteqartoqassaaq.

§ 36. Nioqqutissat nassiunneqartut anninneqarnerminni nalingisa tamarmiusut nalunaarummut ataatsimut 10.000 kr.-t sinnersimappatigik, avammut niuertup nioqqutissanik tiguisussap akiligassaatut allagartaliaq imaluunniit taassuma assilineri Akileraaruseriffimmut tunniutissavaa.

Imm. 2. Nioqqutissanut atorineqarallartussanngorlugit nassiunneqartunut akiligassanut allagartaliaagallartoq tunniunneqassaaq, anninneqartut qanoq naleqarnerat apeqqutaatinnagu.

Allakkat

§ 37. Poortukkanik Savalimmiuni nunaniluunniit allani tiguisussanut nassiussinermi, § 34 naapertorlugu nassiussaq ilaatinneqarpat aatsaat, annissinermik nalunaarusiortoqassaaq.

Imm. 2. Nioqqutissat nassiunneqaleranni annissinermik nalunaarut nassiussanik assartuisumut tunniunneqassaaq.

§ 38. Poortukkanik Danmarkimi tiguisussanut nassiussinermi Kalaallit Nunaanni annissinermik nalunaarusiortoqassanngilaq.

Danmarkimut nunanullu EU-mut ilaasortaasunut allanut annissinermi nioqqutissat uppernarsaataat

§ 39. Avammut nioqqutissanik nassiussinermi nunanut EU-mut ilaasortaasunut eqqussineq akitsuutitigut ajornaannerusumik pisinnaaqqullugu nioqqutissaq pilersinneqaqqaarnerannut uppernarsaateqassaaq. EU-p killissarititaannik qaangiisunik nassiussinermi, nunatsinni avammut nassiussisartut pilersinneqaqqaarnerannut uppernarsaammik pissarsisinnaassagunik REX-aaqqissuussamut (Registered Exporter System) nalunaarsorsinnaapput.

Imm. 2. Nassiussanut, taamaallaat nioqqutissanik nunami aalajangersimasumi pilerseqqaarneqarnertik pissutigalugu nioqqutissanik eqqussinermi akitsuutitigut ajornaannerusumik pineqartussanik, aammalu nalimikkut EU-p killissarititaannik qaangiisimangitsunik imalinnut tunngatillugu, avammut niuertup pilersinneqaqqaarnerannut uppernarsaat REX-aaqqissuussamut (Registered Exporter System) nalunaarsoqqaarnani pissarsiarisinnaavaa.

Imm. 3. Nioqqutissat inuussutissarsiornermut tunngassuteqanngitsut poortukkani mikisuni Danmarkimi inunnut ataasiakkaanut nassiunneqartut nioqqutissat uppernarsaataannik ilaqartinnagit nassiunneqarsinnaapput, nassiussat tamakkerlutik nalingisa EU-p killissarititaa qaangersimangippassuk, aammalu nassitsisup nalunaarutigippagu nassiussat nioqqutissanik nunami aalajangersimasumi pilerseqqaarneqarnertik pissutigalugu akitsuutitigut ajornannginnerusumik pineqartussanik imaqartut.

Nunanut allanut, Kalaallit Nunaata niueqateqarnissamik isumaqatigiissuteqarfigisimasaanut annissinermi nioqqutissat uppernarsaataat

§ 40. Nunami, Kalaallit Nunaata niueqateqarnissamik assigisaanilluunniit isumaqatigiissuteqarfigisimasaani nioqqutissanik eqqussineq akitsuutitigut ajornaannerusumik pisinnaaqqullugu, nioqqutissaq akileraaruseriffiup nioqqutissat uppernarsagai imaluunniit nioqqutissat nunami sorlermi pilersinneqaqqaarnerannut uppernarsagai, akileraaruseriffimmit atsiorneqarlunilu naqissuserneqarsimasussamik ilaqartinneqassaaq.

Nioqqutissanik annissuineq pillugu aalajangersakkat nalinginnaasut

§ 41. Aalisakkanik aalisakkanillu nioqqutissianik annissinermi, aalisakkat sumi pisarineqarsimaneri, angallat suna atorlugu pisarineqarsimaneri, suuneri, anninneqartut qanoq annertutigineri, avammut nioqquteqarsinnaanermut akuersissutip normua il.il. pillugit paasissutissiinissamut Akileraaruseriffik erseqqinnerusunik aalajangersaasinnaavoq.

§ 42. Annissinermik nalunaaruteqarnermi immersugassat Akileraaruseriffimmit akuerineqarsimasut, immersugassat immikkoortortalersorneri immersornissaannullu najoqqutassat naapertorlugit immersorneqartussat atorneqassapput.

Imm. 2. Paasissutissat elektroniskiusumik nassiunneqarnissaat Akileraaruseriffiup piumasarisinnaavaa.

Imm. 3. Paasissutissat qanoq ittuunissaat, iluseqarnissaat tulleriarneqarnissaallu, pissutsillu allat Akileraaruseriffiup digitaliusumik nalunaarutigineqartunik suliaqarnissaanut pingaaruteqartut pillugit piumasqaatit Akileraaruseriffiup aalajangersarsinnaavai.

Imm. 4. Immersugassat ilaqartinneqassapput ilumoortuunerannik uppersarsaatitut allagartanik, soorlu akiligassat allagartaannik, nassiussinermi uppersarsaatinik imaluunniit eqquassinissamut akuersissutinik.

Kapitali 5 *Nakkutilliineq*

Umiarsuarnik nakkutilliineq

§ 43. Umiarsuarmi, ingerlaarfimmik Akileraaruseriffimmut siumut nalunaarutigineqarsimasumik aalajangersimasumik ingerlaarfeqanngitsumi naalagaasup, umiarsuup Kalaallit Nunaanni akitsuuteqarfiusumut tikinnerani, tikinnertik umiarsualivimmi oqartussaasunut qaninnerpaanut erngerluni nalunaarutigissavaa, Kalaallillu Nunaanni umiarsualiviup tikinnissaa kingusinnerpaamik nal.ak. 24-nik sioqqullugu umiarsualivimmi tikiffissami oqartussaasut nalunaarfigissallugit piffissaq umiarsuup tikiffissaatut ilimagisaq pillugu. Danskit umiarsuaasa sinerissami nakkutilliisut taamaallaat umiarsualivimmi oqartussaasunut tikiffissartik nalunaarutigisassavaat, tamanna illersornissamut qullersaqarfiup suliaasa isumagineqarnerannut naapertuuttuuppat.

Imm. 2. Umiarsuup qaqugu tikissangatinneqarneranik nalunaarut tiguinnarlugu umiarsualivimmi oqartussaasut Akileraaruseriffik tamatuminnga nalunaarfigissavaat kiisalu umiarsuit nalunaaruteqarsimangitsut tikinnerat nalunaarutigissallugu. Umiarsualivimmili oqartussaasut umiarsuit, ingerlaarfimmik Akileraaruseriffimmut siumut nalunaarutigineqarsimasumik aalajangersimasumik ingerlaartut tikiffissaat nalunaarutigisariaqanngilaat imaluunniit tikinnissamut umiarsualiviup umiarsualivimmi pisortatigoortumik allattuiani takuneqarsinnaasumi, sivikinnerpaamik nalunaaquttap akunneri 24-t sioqqullugu tikiffissatut siumut nalunaarutigineqartumut naleqqiullugu.

§ 44. Tikinnermi piaarnerpaamik umiarsuup naalagaata imaluunniit umiarsuup piginnittuata tuniniaasiataluunniit Akileraaruseriffik umiarsuaq, usit taqussallu pillugit allakkatigut nalunaarfigissavaa, kiisalu umiarsuup inuttallu nioqqutissaataat akitsuusigassaataat pillugit allakkatigut nalunaaruteqassalluni, taamaattorli takukkit imm. 2 aamma 3.

Imm. 2. Umiarsuarmi Kalaallit Nunaanni nalunaarsorneqarsimasumi naalagaasup imaluunniit umiarsuup piginnittuata tuniniaasiataluunniit, umiarsuup Danmarkimi Savalimmiuni nunaniluunniit allani imaluunniit akitsuuteqarfiusup avataani angalareerluni akitsuuteqarfiusumut tikinnissaa nal.ak. 24-nik sioqqullugu Akileraaruseriffik umiarsuaq, usit taqussallu pillugit allakkatigut nalunaarfigissavaa kiisalu umiarsuup inuttallu nioqqutissaataat akitsuusigassaataat pillugit allakkatigut nalunaaruteqassalluni.

Imm. 3. Akitsuuteqarfiusumut tikinnermi umiarsuup naalagaa erngerluni nioqqutissat akitsuusigassat umiarsuup nassatai pillugit akitsuusiinissamik nalunaaruteqassaaq akitsuusertissallugillu, aammalu inuttat ataasiakkaat nioqqutissat akitsuusigassaataat namminneq atugassatut nassataasa allattorsimaffiannik Akileraaruseriffimmut tunniussaqaassalluni.

§ 45. Umiarsuup akitsuuteqarfiusumi umiarsualivimmiit umiatsialivimmiilluunniit aallartussanngortup

naalagaata aallarnissaq Akileraaruseriffimmut nalunaarutigissavaa, umiarsuarlu aallassanngilaq Akileraaruseriffik akuersissuteqartinnagu.

Imm. 2. Aallarnissamik nalunaaruteqartussaataaangillat umiarsuit, tak. imm. 1, angalanermut pilersaarut Akileraaruseriffimmut siumut nalunaarutigineqareersimasoq naapertorlugu angalasut.

Imm. 3. Nioqqutissat taqussallu, akileraartarnermut malittarisassat unioqqutillugit akitsuuteqarfusumi umiarsuarmit peerneqartut atorneqartulluunniit akitsuutaat umiarsuup naalagaata akisussaaffigai.

Timmisartunik nakkutilliineq

§ 46. Timmisartoqarfimmi pisortat timmisartup tikiffissaatut aallarfissaatullu naatsorsuutigisaaq Akileraaruseriffimmut nalunaarutigissavaat kiisalu timmisartut tikinnissartik nalunaarutigisimanagu tikittut nalunaarutigissallugit. Timmisartut aalajangersimasumik angalaartut, angalanermut pilersaarut Akileraaruseriffimmut siumut nalunaarutigineqareersimasoq naapertorlugu tikittut nalunaarutigineqartariaqanngillat.

Imm. 2. Akitsuuteqarfusumut tikinnermi timmisartup naalagaata piaarnerpaamik nalunaarutigissavaa timmisartoq suminngaanneernersoq, kiisalu timmisartoq, usit taqussallu pillugit Akileraaruseriffimmut allakkatigut nalunaaruteqassalluni aammalu timmisartup inuttallu nioqqutissaataat akitsuusigassaatit pillugit allakkatigut nalunaaruteqassalluni.

Imm. 3. Timmisartumi, nunat tamalaat akornanni ilaasunik angallassissutitut angalanngitsumi naalagaasup, akitsuuteqarfusumut tikiinnavilluni nioqqutissat akitsuusigassat timmisartup nassatai akitsuusigassatut nalunaarutigissavai akitsuutillu akilerlugit.

Imm. 4. Timmisartup, akitsuuteqarfusumi timmisartoqarfimmiit aallartussanngortup naalagaata aallarnissaq Akileraaruseriffimmut nalunaarutigissavaa, timmisartorlu aallassanngilaq Akileraaruseriffik akuersissuteqartinnagu. Aallarnissamik nalunaartussaangillat timmisartut, angalanermut pilersaarut Akileraaruseriffimmut siumut nalunaarutigineqareersimasoq naapertorlugu angalasut.

Imm. 5. Nioqqutissat taqussallu, malittarisassat unioqqutillugit akitsuuteqarfusumi timmisartumiit peerneqartut atorneqartulluunniit akitsuutaat timmisartup naalagaata akisussaaffigai.

Akileraaruseriffiup pisussaaffii piginnaatitaaffilu il.il.

§ 47. Akileraaruseriffiup nioqqutissap suuneranik misissuinerminut atatillugu nioqqutissap oqartussaasunit allanit, innersuussutigisinnaavaa, tamanna eqqussuineq annissuinerlu pillugit aalajangersakkat, peqqinnissaq, isumannaallisaanissaq, uumasut nakorsaqaarneq allalluunniit pissutigalugit immikkut aalajangersagaasut malinniarlugit pisariaqarsorineqarpat. Misissuineq Akileraaruseriffiunngitsumit, oqartussaasunilli allanit isumagineqarpat, misissuineq taanna Akileraaruseriffik isumaqatigilluinnarlugu pisassaaq, sapinngisamillu piffissami sumiiffimmiilu aalajangersimasumi pisassalluni.

Imm. 2. Akileraaruseriffik nioqqutissanik misissugassanngortitsisimappat, nioqqutissat aatsaat tigusisussamut tunniunneqarsinnaalissapput misissuineq naammassineqarpat nioqqutissallu Akileraaruseriffiup tunniutassanngortippagit. Nioqqutissat peqqinnissaq, isumannaallisaanissaq allalluunniit pissutigalugit, nioqqutissat pillugit aalajangersakkani immikkut ittuni pineqartunut ilaappata, aalajangersakkat taakku eqquutsinneqarpat aatsaat Akileraaruseriffimmit

tunniutassanngortinneqarsinnaapput.

Imm. 3. Akileraaruseriffiup nioqqutissanik misissuinissaq siunertaralugu, umiarsuit timmisartullu akitsuuteqarfinnut taaneqartunut innersuussinnaavai, ingerlavissarlu Akileraaruseriffimmit aalajangerneqartoq ingerlaffigeqqullugu.

§ 48. Akileraaruseriffiup Kalaallit Nunaanni Politiit pisortaat isumaqatigiissuteqarfigisinnaavaa, politiit nakkutilliinermik sulianik Akileraaruseriffittuulli isumaginninnissaannut piginnaatitsinissamik, tak. Nioqqutissanik eqqussuineq annissuinerlu pillugit Inatsisartut inatsisaanni § 38.

§ 49. Nassiussat usigineqartut Akileraaruseriffiup piumasaqarneratigut ammarlugit misissorneqarsinnaapput.

Imm. 2. Nioqqutissat nassiussat misissorneqarnerannut atatillugu nioqqutissanik tiguisut nassiussisullu pisussaapput pisariaqartunik isumaginnissallutik, matumanilu puuiaallutik, poortuillutik, oqimaalutaallutik aamma uuttortaallutik.

Imm. 3. Nioqqutissalli puuiarneqarnerminni akornuserneqarsinnaasut aserorneqarsinnaasulluunniit, imaluunniit pigisanik inunnilluunniit ajoquseeratarsinnaasut, imarisai aserujasuunerat imaluunniit ulorianarnerat pissutigalugu aserujasutut erseqqissumik ilisarnaaserneqassapput. Tamatumani soorlu makku pineqarput: Natrium, gassit naqitsinilinnik puullit, akuutissat radiop qinngornerinik ulorianartunik akullit, akuutissat tunillannartut, filmit qaamanermut misikkarissut qajuusaasallu plastikimik seqqitsaatissiat aqerlorterlugit matusanik puukkat.

Imm. 4. Nassiussat nioqqutissanik imm. 3-mi taaneqartunik imallit ammarneqarniarpata tiguisusaaq Akileraaruseriffimmit tamatumingna nalunaarfigineqassaaq, taamaalilluni taassuma ilitersuussutigisinnaammagu nioqqutissat isumannaatsumik qanoq ammarneqarsinnaanersut.

Imm. 5. Akileraaruseriffik nioqqutissat suunerinik misissuinissamini, nioqqutissanik misissugassanik naammattunik taarsiinertaqanngitsumik tiguisinnaatitaavoq. Akileraaruseriffik nioqqutissat misissorneqartussatut tigusat assinginik amerlaqataannillu taarserneqarnissaannik akuersissuteqarsinnaavoq, nassiussat tamarmiusinnaaqqullugit.

Imm. 6. Nioqqutissanik nassitsisoq nioqqutissat misissorneqareernerisa kingorna pisinnaatitaavoq misissugassatut tiguneqartut misissuinermi atorneqanngitsut piumasaqarnikkut utertissallugit.

Imm. 7. Nioqqutissanik nassitsisoq, tiguisisoq imaluunniit annissisoq pisussaavoq nioqqutissat Akileraaruseriffimmut piaartumik takutissallugit pisarialimmik misissuisinnaaneq ingerlanneqarsinnaaqqullugu.

§ 50. Poortukkat nassiussanik assartuisukkat nassiunneqartut adressedkortiusinnaasunik sunillu imaqarnerinik nassuiaatinik ilaqartinneqartut Akileraaruseriffimmut misissugassanngorlugit allakkerivimmit saqqummiunneqassapput.

Imm. 2. Misissuineq allakkeriviup iniutaani ingerlanneqassaaq, taamalu Akileraaruseriffik piginnaatitaavoq nakkutilliinerup ingerlanneqarnissaanut pisariaqartumik qanorluunniit iliorluni misissuinissaminut. Misissuinermi puuiaaneq poortuinerlu allakkerisoqarfimmit isumagineqassaaq.

Kapitali 6

Pineqaatissiisarnermut atortussanngortitsinermullu aalajangersakkat

§ 51. Piaaraluni imaluunniit mianersuaalliorluni ima iliortoq akiligassinneqarsinnaavoq:

- 1) Nioqqutininik tiguisutut imaluunniit nassiussisutut, § 1-imi, imm. 1 naapertorlugu, paasissutissanik nassiussinngitsiq.
- 2) Nioqqutissanik akitsuusigassanik, § 4-mi, imm. 1 aamma 2 naapertorlugit, akitsuusernissaannut nalunaarsuinani eqqussisq.
- 3) Nioqqutissanik akitsuusigassanik, § 5-imi, imm 1-3 naapertorlugit, akitsuusernissaannut nalunaarsuinani eqqussisq.
- 4) Nioqqutissanik, § 7-imi, imm. 1-4 imaluunniit § 8-mi, imm. 1-3 naapertorlugit, nioqqutit nalunaarsornagit eqqussisq.
- 5) Assartuisoq, § 9-mi, imm. 2 naapertorlugu, paasissutissanik nassiussinngitsiq.
- 6) Nioqqutissanik tiguisoq, § 9-mi, imm. 1, naapertorlugu piffissaliussamik eqquutsitsinngitsiq imaluunniit nioqqutissanik annitassanik, § 9-mi, imm. 3 unioqqullugu uninngatitsisq.
- 7) § 11 naapertorlugu piginnittup allangornera pillugu nalunaarsuinngitsiq.
- 8) Nioqqutissanik annissuinermi, § 33-mi, imm. 1-3 naapertorlugit, annissuinermit nalunaarsuinngitsiq.
- 9) Nioqqutissanik annisseqqinnermi, § 35-mi, imm. 1 aamma 2 naapertorlugit, nalunaarsuinngitsiq, nalunaarusiinngitsiq imaluunniit uppernarsaasiinngitsiq.
- 10) § 36-mi, imm. 1 aamma 2 naapertorlugit, akiligassat allagartaliunngitsiq.
- 11) Allakkatigut poortukat anninneqarneranni, § 37-mi, imm. 1 naapertorlugu, nalunaarusiinngitsiq.
- 12) Tikinnermini, § 43-mi, imm. 1 naapertorlugu, umiarsualivinni oqartussaasunut nalunaarutiginninngitsiq.
- 13) § 44-mi, imm. 1-3 naapertorlugit allakkatigut nalunaarusiinngitsiq imaluunniit akitsuusigassaatanik nalunaaruteqanngitsiq.
- 14) § 45-mi, imm. 1 imaluunniit § 46-mi, imm. 4 naapertorlugit avalattoq imaluunniit aallartoq nalunaaruteqanngitsiq.
- 15) § 46-mi, imm. 2-3 naapertorlugit, akitsuusigassaatanik akitsuusiinissamut allakkatigut nalunaarusiinngitsiq imaluunniit nalunaarsuinngitsiq.
- 16) § 49-mi, imm. 3 aamma 7 naapertorlugit nioqqutissanik ilisarnaasiinngitsiq imaluunniit takutitsinngitsiq.

§ 52. Piaaraluni imaluunniit mianersuaalliorluni ima iliortoq akiligassinneqarsinnaavoq:

- 1) § 3 naapertorlugu nipitittakkanik nalunaaqutsiinngitsiq.
- 2) § 27-mi, imm. 2 aamma 4 unioqqullugit nioqqutissanik akitsuusigassaanngitsunik tuniniaasoq.
- 3) § 27-mi, imm. 5 naapertorlugu nioqqutissanik akitsuusigassaanngitsunik uninngatitsinngitsiq.
- 4) § 28-mi, imm. 2 naapertorlugu annertussutsit avataatigut akitsuusigassaanngitsunik taquassarsiniartq.
- 5) § 28-mi, imm. 4 aamma 6 naapertorlugit taquassanik uninngatitsinngitsiq.

Imm. 2. Imm. 1-imi taaneqartutut unioqqutitsisoqarneratigut imaluunniit unioqqutitserialuortoqarneratigut akiliisitaasussanngortitsinermi akiliisitaasussanngortitsinnginnermiluunniit nioqqutissaq, taannaluunniit peqanngippat taassuma aningaasanngorlugu nalingata amerlaqatai arsaarinnissutigineqarsinnaapput.

Atuutilerfia

§ 53. Nalunaarut 27. november 2024-mi atuutilerpoq.

Imm. 2. Tamatumunnga peqatigitillugu Nioqqutissanik eqqussuineq annissuinerlu pillugit
Namminersorlutik Oqartussat nalunaarutaat nr. 24, 5. oktobari 2016-imeersoq atorunnaarsinneqarpoq.

Namminersorlutik Oqartussat, ulloq 19. november 2024.

Erik Jensen (atsior.)

Aningaasaqarnermut Akileraartarnermullu Naalakkersuisoq

/ Nikolai S. Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut